

Tabrat wiss Tnayen n Bulus i Itissalunikiyyen

Aseġem

1 ¹Bulus d Silwanus d Timutiyyu, i tmesmunt n Tisaluniki di Arebbi Babatney d Sidi Yeccu Lmasiħ. ²Nniemet d řehna zi Arebbi, Babatney u zi Sidi Yeccu Lmasiħ ad kiwem iřin.

Aqadi d tzaġit

³Icuwwar ad nqada Arebbi xawem řebda, a awmaten, am mammec ittřiq, minzi liman nwem imeqqar uca tayri n kuř ijjen zzaywem marra i wenneđni tarenni tmeqqar ktar. ⁴X uyenni nettfeyyec xawem ařtas di tmesmunin n Arebbi x ssibbet n řřbar d liman nwem di marra amarret d řehřart nwem inni teksim. ⁵Man aya d lburhan n řřukm isseggden n Arebbi, aqqa tetwařasbem tesdaheġem tageldit n Arebbi tenni i xef teksim amarret. ⁶Minzi Arebbi d amseggad umi i řa ixegęs s řehřart i inni kenniw iřřaren, ⁷uca i kenniw inni itwařsaren s ureyyeř řar usargeb n Sidi Yeccu zeg ujenna ak-d lmalakat n jjehd nnes ⁸di tmesi itteħduduqen, x minni i řa intaqem inni war issinen ca Arebbi d inni war iřtaeēn řexbar ařebħan n Siditney Yeccu. ⁹Ina ad ksin aweddeb n uhellek i řebda, ad iřin ggwejen x wudem n Sidi u x ueuġi n jjehd nnes, ¹⁰xmi i d řa yas netta řima ad itwaēuġi deg wass nni di marra imqeddasen nnes uca ad dayes ttbehten marra inni dayes yumnen, minzi chadet nney i kenniw tetwaqbeř s liman. ¹¹Zi man aya nkessi awem řmeeruf řebda, řima Arebbi nney ad kenniw iřseb ad tesdahġem tařayit u řima Arebbi nney ad ikemmeř daywem s jjehd marra arđa n tcuni d řxedmet n liman, ¹²řima ad itwaēuġi isem n Siditney Yeccu daywem uřa d kenniw dayes s nniemet n Arebbi nney d Sidi Yeccu Lmasiħ.

Bnadem n ddnub

2 ¹Aqqa nettettar zzaywem, a awmaten, x twasit n Siditney Yeccu Lmasiħ d umuni nney akides, ²war ttneřriēem niř tteřřissifem ca deyya, war iġi s ca n arruħ niř s ij n wawař niř s ict n tebrat axmi zzayney, axmi d yusa wass n Sidi. ³War teji uřa d ij ad kenniw

iywa s ca n webrid, minzi netta war d ittis myir awarni xmi i ya ffyen waṭtas zeg webrid uca ad d iban bna dem n ddnub, aqqa-t d mmis n txessart, ⁴wenni ittemeāran u wenni i ya isseuḡen ixef nnes x marra min itwasemman Arebbi niy řqecet n uebad, ař i ya iqqim di taddart iqeddsen n Arebbi uca ad isscen ixef nnes aqqa netta d arebbi. ⁵Ma war teeqiřem ca umi tuya-yi kiwem, aqqa nniy awem-t? ⁶Maca řexxu tiwdem tessnem min d as issbedden ead deg webrid ħima ad d iban di řweqt nnes. ⁷Minzi ssirr n min iḡan d d d n ttawrat aqqa ixeddem řexxu, maca wenni t issbedden aqqa-t din ař i ya immeksi zi řwest. ⁸Di řweqt nni ad iđhar wenni nnebřa ttawrat, wenni i ya issellek Sidi Yeccu s twarrit n nnefs zeg uqemmmum nnes uca ad t issebdeř s tissiqt n twasit nnes. ⁹Maca twasit n wenni nnebřa ttawrat am řxedmet n Cciřan s marra jjeħd n řeġjayeb d řeġřamat d lmuġizat issxarriqen, ¹⁰uca s marra řyecc n min war isseggden qibač i yinni i ya ihelken, minzi nitni war qbiřen ca tayri n tidett ħima ad twassnejmen. ¹¹X uyenni Arebbi ad ġarsen-d issekk min ten ya yarr ġar uweddar *ktar* maħend ad amnen deg uxarriq, ¹²ħima ad twaħakmen marra inni war yuminen ca di tidett, maca arđan di min war isseggden.

Beddem nican di liman u deg useřmed i teksim

¹³Maca icuwwar aney ad xawem nqada Arebbi řebda, a awmaten inni ixef ieizz Sidi, belli Arebbi aqqa ixđar i kenniw zeg umezwaru i usenjem s tuqeddsi zi Arruħ u s liman n tidett. ¹⁴Aqqa iřaya-d xawem i man aya s řexbar ařebħan nney, ħima ad teksim aeuġi n Sidi Yeccu Lmasiħ. ¹⁵X uyenni, a awmaten, beddem nican uca ttfem di tubbart i d awem itwassřemden zzayney, mma s wawař niy s tira. ¹⁶Uca Siditney Yeccu Lmasiħ s ixef nnes d Arebbi Babatney, wenni d aney ixsen d wenni d aney iwcen afewwej i řebda d usitem icnan s nniemet, ¹⁷ad issfewwej uřawen nwem uca ad kenniw issejhed di marra řxedmet d wawař ařebħan.

Tutra n Bulus maħend ad as ksin řmeeruf

3 ¹Lħasul, a awmaten, ksim aney řmeeruf ħima awař n Sidi ad d iffeġ deġya u ad itwasseuġ am mammec tuya imsar jarawem sawed ²u ħima ad netwassenjem zeg iwdan war iħřin iħeffanen,

minzi liman war iği yar marra. ³Maca Arebbi d ašđiq wenni d awem i ya issjehden uca ad kenniw išsar zeg uęeffan. ⁴Maca neccin nettiqq di Sidi belli min xef nwešša kenniw, aqqa tetteggem t uca ad teqqimen tetteggem t. ⁵Ad indeh Sidi uřawen nwem yar tayri n Arebbi d ššbar n Lmasih.

Aeřam zeg inni igguren nnebřa usettef

⁶Maca nwešša kenniw, a awmaten, deg isem n Sidi Yeccu Lmasih, ad ttheyydem i kuř uma i igguren nnebřa asettef, war iği elařsab tubbart i iksin zzayney. ⁷Aqqa kenniw tessnem mammec icuwwar ad aney đfaren, minzi neccin war nuyur jarawem nnebřa asettef ⁸uca war necci ayrum ak-d ħed bařeř, maca s řxedmet d tamara tuya-ney nxeddem ġiřet d wass ħima war d nettis neđqeř x ca n ijjen zzaywem. ⁹War iği minzi war řarney ttesriř i man aya, maca ħima ad negg ixef nney d lmatal i ya teđfaren. ¹⁰Minzi řami tuya-ney neđa akidwem, aqqa nwešša ammu: mařa ħed war ixš ad ixdem, war ittett eawed. ¹¹Minzi nesřa aqqa din ca jarawem inni igguren nnebřa asettef am war xeddmen ca, maca tteggem min war issekkwin. ¹²Aqqa numur u nziyyar iwdan am yina di Sidi Yeccu Lmasih ħima ad xedmen di řhudnet, ad ccen ayrum nsen. ¹³Maca kenniw, a awmaten, war tuřiřem ca mařend ad teggem min icnan. ¹⁴Maca mařa ca n ijjen war iřtae i wawař nney i yuran di tebrat-a, arecmem t, war ttexeđdem akis, ħima ad idweř iřeđħa, ¹⁵maca war t tħessbem d řeđu maca nedhem t yar webrid am ijjen tawmat.

Awař d useğem aneggaru

¹⁶Sidi n řehna simant nnes ad awem iwc řehna nnes i řebda x marra iyezdisen. Sidi ad yiři akidwem marra. ¹⁷Ij n useğem s ufus inu, Bulus. Ta d řeęřamet n kuř tabrat. Ammu i d uriy. ¹⁸Nniemet n Siditney Yeccu Lmasih ad kiwem tiři. Amin.